

Bosna I Hercegovina  
Federacija BiH  
Kanton Sarajevo  
Skupština Kantona Sarajevo  
n/p g.Mirza Čelik, Predsjedavajući SKS

## INICIJATIVA

kojom Skupština KS traži

- da se putem Ureda za borbu protiv korupcije i upravljanje kvalitetom izvrši nadzor u smislu provjere zakonitosti postupka izdavanja restorana Benetton na Bjelašnici od strane uprave KJP ZOI 84, te o nalazu izvijesti Skupština KS;
- da Nadzorni odbor ZOI '84 dostavi detaljnu informaciju o svim činjenicama koje se odnose na predmetni poslovni odnos u smislu svojih saznanja i postupanja;

### **Obrazloženje:**

Na osnovu informacija iz medija upoznata sam da je preduzeće ZOI'84 iznajmilo restoran Benetton na Bjelašnici privatnom poduzetniku. Ugovor se zaključuje na šest godina i važi od 17. aprila 2020. do 17. aprila 2026. godine. Cijena zakupa po ugovoru koji smo imali priliku vidjeti u medijima se utvrđuje na sljedeći način:

- Za period januar – april zakupnina iznosi mjesečno 5.500 KM i za period maj – decembar mjesečna zakupnina iznosi 1.600 KM.
- Na godišnjem nivou bruto zakupnina iznosi 34.800 maraka sa uračunatim PDV-om.
- Zakupnina se počinje obračunavati od 20. juna 2020. godine i zakupac se obavezuje da u roku od 30 dana od dana potpisivanja ugovora uplati zakupninu u iznosu 11.200 KM za juni, juli, august, septembar, oktobar, novembar i decembar 2020. godine, koja će se voditi kao avansna uplata za navedene mjesece .

Direktor je u svojim medijskim nastupima naglasio kako se javni poziv prilikom izdavanja objekta nije raspisivao, već je odabir i dodjela Ugovora izvršena u skladu sa internim pravilima ZOI'84, što sa svoje strane predstavlja očigledno objektivan razlog sumnje javnosti u transparentnost i zakonitost postupka što je neophodno utvrditi nalazom Ureda za borbu protiv korupcije.

Ostaje, naravno, otvorena uloga Nadzornog odbora ZOI '84, te je izuzetno važno da dobijemo i njihovu detaljnu informaciju u smislu postupanja kada su u pitanju njihova zakonska ovlaštenja vezana za konkretni ugovor.

- Konkretno, da li je data saglasnost nadzornog odbora na ugovor koji je očigledno sačinjen po internim pravilima ZOI '84 i kojim aktima su propisana konkretna pravila na koja se direktor poziva?

- Da li je ukidanje djelatnosti ugostiteljstva i potpisivanje ugovora u trajanju od šest godina, bez objavljivanja javnog poziva, odobrena od strane nadzornog odbora u smislu godišnjeg plana poslovanja?

- Zabrinjava činjenica da je ugovor potpisan u vrijeme vanrednog stanja izazvanog pandemijom i to bez objavljivanja javnog poziva, te stoga očekujemo odgovor na osnovu kojih internih akata je ugovor potpisan na vremenski period od šest godina?

U nadi da će navedena inicijativa razjasniti sve nedoumice u javnosti i posljedično pravno zaštititi imovinu javnih preduzeća u vlasništvu KS, očekujem da moju inicijativu podržite i samim tim prosljedite nadležnim na postupanje.

Sarajevo, 30.4.2020.

Segmedina Srna Bajramović

Zastupnica SDP BiH u SKS